

ა(ა)იპ ოზურგეთის მუნიციპალიტეტის ცენტრალურ ბიბლიოთეკაში
2019 წელში ჩატარებული მუშაობის შესახებ

ცენტრალური ბიბლიოთეკა არის ინფორმაციის ადგილობრივი ცენტრი, რომელიც ხელმისაწვდომს ხდის მკითხველისათვის ყველა სახის ინფორმაციასა და ცოდნას. ბიბლიოთეკა უზრუნველყოფს მომსახურებას ყველასათვის, მიუხედავად ასაკისა, ეროვნებისა, ენისა თუ სოციალური მდგომარეობისა. ვცდილობთ მკითხველს შევუქმნათ ხელსაყრელი პირობები შემოქმედებითი განვითარებისათვის, რისთვისაც გამოყენებულია ბიბლიოთეკის ფონდები და ტექნიკური საშუალებები, უფასო ინტერნეტი. წიგნადი ფონდები სისტემატურად ივსება ახალი გამოცემებით, რომელთა შეძენისას გათვალისწინებულია მკითხველთა ინტერესები. წიგნადი ფონდების შევსების მიზნით კავშირი გვაქვს წიგნის გამომცემლებთან და მაღაზიათა ქსელ „ბიბლუსთან“. 2019 წელს შეძენილ იქნა 5000 ლარამდე ღირებულების წიგნი, საქართველოს საბიბლიოთეკო ასოციაციის მიერ გადმოგვცა 450 ლარის ვაუჩერი, რომლითაც საბავშვო წიგნები შევიძინეთ სასოფლო ბიბლიოთეკებისათვის. სისტემატურად გვიგზავნის ახალ ნაშრომებს მეცნიერებათა ეროვნული აკადემია, ასევე ჩვენი რაიონის მკვიდრებმა პირველი არხის სპორტულმა ჟურნალისტმა ელენე ბილიხოძემ, ანზორ გოთუამ, ზვიად ნოდიაშვილმა, ლანჩხუთის ეგნატე ნინოშვილის სახელობის სახლ-მუზეუმის მეცნიერ-თანამშრომელმა გვისახსოვრეს საკუთარი ნაშრომები, ხოლო 5 შვილის დედამ ცინარი მეგრელიშვილმა პირადი ბიბლიოთეკიდან გადმოგვცა წიგნები.

ბიბლიოთეკას გამოწერილი აქვს ჟურნალ-გაზეთები, მ/შორის ყველა სოფლის ბიბლიოთეკას მიეწოდება ადგილობრივი გაზეთები. მკითხველისათვის მალე ამოქმედდება მომსახურების ახალი სერვისი ელექტრონული კატალოგების სახით. ელექტრონული აბონემენტი - ეს არის თავისუფალი დაშვება ბიბლიოთეკის ფონდებთან, რომლის საშუალებითაც მკითხველს ექნება ინფორმაცია არის თუ არა მისთვის სინტერესო წიგნი ბიბლიოთეკაში.

დღეისათვის გაერთიანების მთლიანი ფონდი შეადგენს 106 637 ეგზემპლარს, მ/შორის 10 000-მდე ერთეული განკუთვნილია ბავშვი მკითხველებისათვის. ცენტრალურ ბიბლიოთეკაში 42 760 წიგნია, მ/შორის 6938- საბავშვო.

წლის განმავლობაში მომსახურებულია 6000-ზე მეტი მკითხველი, მ/შორის 962 ბავშვია.

საანგარიშო პერიოდში ცენტრალურ ბიბლიოთეკაში დაინერგა ბავშვთა და მშობელთა მომსახურების ახალი სერვისი. გაიხსნა ოთახი ბავშვებისათვის,

სათამაშოებით, სათამაშო წიგნებით, საბავშვო ინვენტარით და ა.შ. მშობლებს, რომელთაც გამოუჩნდათ აუცილებელი საჭიროება გარკვეული დროის განმავლობაში და არ ჰყავთ ბავშვის დამტოვებელი, შეუძლიათ მოიყვანონ ბიბლიოთეკაში, სადაც მას შეუძლია, გაერთოს, დახატოს, გამოძერწოს, ნახოს მულტფილმები მოაწყოს გამოფენა წაკითხული ზღაპრის გმირების ნახატებით და ა.შ. წლის განმავლობაში არაერთმა ბავშვმა და მშობელმა ისარგებლა ამ მომსახურებით

განსაკუთრებული ყურადღება ექცევა იმ მკითხველებს, რომელთაც სხვადასხვა მიზეზების გამო არ შეუძლიათ ბიბლიოთეკაში მოსვლა. ამ მიზნით ჩვენ კავშირი გვაქვს საქველმოქმედო ასოციაცია „გურიას“ და ანასეულის ხანდაზმულთა სახლის ბენეფიციარებთან. განსაკუთრებული საჭიროების პირთათვის შევიძინეთ ლიფტი, რაც გაუადვილებს მათ შენობის მთელ პერიმეტრზე გადაადგილებას. ვატარებთ ზღაპრის დღეებს და საახალწლო ღონისძიებებს.

მკითხველთა მომსახურების გაუმჯობესების მიზნით კავშირი გვაქვს სხვა ბიბლიოთეკებთან, საიდანაც, საჭიროების შემთხვევაში შეგვიძლია მივიღოთ ისეთი წიგნი, რომელიც ჩვენს ფონდებში არ არის. ასევე ვთანამშრომლობთ საერთაშორისო ორგანიზაციებთან: პოლონეთისა და შვეიცარიის საელჩოებთან, საქართველოში შვეიცარიის განვითარებისა და გაეროს განვითარების პროგრამა საქართველოში - ორგანიზაციებთან. ამ ორგანიზაციებიდან დაფინანსებული პროექტების ფარგლებში ჩავატარებთ ტრენინგები ჩოხატაურის, ლაჩხუთისა და ოზურგეთის სასოფლო და სასკოლო ბიბლიოთეკების ბიბლიოთეკარებისათვის, ჩავატარებთ საზოგადოებრივი შეხვედრები საგზაო უსაფრთხოების, გენდერულ, სოფლის მეურნეობის თემებზე.

შვეიცარიის საელჩომ საჩუქრად გადმოგვცა ფერადი პრინტერი კერტიჯებით, რომელიც აუცილებელი იყო ბიბლიოთეკისათვის. ასევე გასულ წელს გადმოგვცა პროცესორები. მერიამ გადმოგვცა მონიტორები, შევიძინეთ საჭირო აქსესუარები და 4 ერთეული ტექნიკა კიდევ შეემატება სასოფლო ბიბლიოთეკებს. სასოფლო ბიბლიოთეკებისათვის შეძენილ იქნა სკამები, გადავეცით წიგნის თაროები

ბიბლიოთეკის ცნობადობის გაზრდის მიზნით ტრადიციად იქცა ტაქსის დღის აღნიშვნა. ამ ღონისძიების მიზანია, ტაქსისტებმა იცოდნენ ბიბლიოთეკის ადგილსამყოფელი და მგზავრი უპრობლემოდ მოიყვანონ ჩვენთან.

წლის განმავლობაში ტარდება საინტერესო ღონისძიებები, როგორც მოზრდილების, ისე ბავშვებისათვის: საშობაო საღამო პატარა მკითხველებისათვის ფიფქიასა და თოვლის ბაბუს თანხლებით, საახალწლო შოუ-პროგრამა თოჯინების თეატრთან ერთად ასოციაცია „გურიასა“ და ანასეულის ხანდაზმულთა სახლში, დეკემბერში მე-2 საჯარო სკოლიძს მოსწავლეებმა წარმოადგინეს „უცნაური საშობაო წესები“ ქვეყნების მიხედვით, საუკეთესო მკითხველებისათვის ნაჩვენები იქნა თოჯინური სპექტაკლი „საახალწლო ზღაპარი“ და გადაეცათ სიგელები. ყველა ბიბლიოთეკაში ჩატარდა

ღონისძიებები საბავშვო წიგნის დღესთან დაკავშირებით, ასევე ფართოდ აღინიშნა 23 აპრილი - წიგნის ჩუქების დღე. მე-2 საჯარო სკოლის მკითხველთა კლუბის „კარცერ-ლუქსი“- ს მიერ ხშირად ეწყობა პრეზენტაციები წაკითხული წიგნების შესახებ. ჩვენი აქტიური მომხმარებლები არიან მკითხველთა კლუბის „ატაგენუსის“ მონაწილენი. ყოველი წლის 1 ივნისს ბავშვთა საერთაშორისო დღესთან დაკავშირებით ვიწვევთ 1 ივნისს დაბადებულ ბავშვებს და საჩუქრებთან ერთად საიუბილეო ტორტითაც ვუმასპინძლდებით.

ქართული ენის დღისადმი მიძღვნილ კვირეულში მონაწილეობა მიიღეს ნასაკირალის, ნარუჯის, მე-2 საჯარო სკოლის მოსწავლეებმა.

ჩატარდა ქუთაისელი ახალგაზრდა მწერლის ბექა ქებულაძისა და ბათუმში მოღვაწე ოზურგეთელი გენრიეტა ქუთათელაძის, თბილისელი ნინო უძილაურის შემოქმედებითი საღამოები.

ბიბლიოთეკაში მიმდინარეობს რამდენიმე პროექტი, მათ შორის მნიშვნელოვანია „ნაბიჯი წიგნისკენ“, რომელშიც ის ბავშვები მონაწილეობენ, რომლებიც პირველად მოდიან ბიბლიოთეკაში. პროექტის მონაწილენი არიან საბავშვო ბაღებისა და საჯარო სკოლების უმცროსკლასელები

ბიბლიოთეკა მჭიდროდ თანამშრომლობს სკოლებთან, არასამთავრობო ორგანიზაციებთან, მედიასთან. ადგილობრივი ტელევიზია და გაზეთები ხშირად ეხმარებიან ჩვენს აქტივობებს. გვეხმარებიან ამერიკელი მოხალისეები, რომლებმაც დაგვილაგეს ამერიკის საელჩოს მიერ გადმოცემული ლიტერატურა. მიმდინარე წელს კიდევ იგეგმება ამერიკის საელჩოდან წიგნების გადმოცემა

ბიბლიოთეკაში სპეციალური ადგილი აქვს დათმობილი გოეთეს ინსტიტუტის მიერ გადმოცემულ გერმანულენოვან წიგნებს, რომლებიც გერმანული ენის პედაგოგებისთვისაა განკუთვნილი. მათთვის ტარდება სპეციალურად პრეზენტაციები.

ბიბლიოთეკა ეწევა მნიშვნელოვან საინფორმაციო მუშაობას. ვადგენთ კართოტეკებს მედიცინის, ტურიზმის, სოფლის მეურნეობის საკითხებზე. შედგენილია საინფორმაციო ბიულეტენი „წმინდა ექვთიმე ღვთისკაცი“. მიმდინარეობს მუშაობა გაზეთ „ალიონის“ არქივზე, ბიბლიოთეკების ისტორიაზე.

დღეს ბიბლიოთეკა მკითხველთა მოზიდვისა და დაინტერესების ახალი ფორმების ძიებაშია. ეს არის ადგილი, სადაც შეიძლება შეხვედრები, ურთიერთობები, ეს არის ადგილი, სადაც არა მხოლოდ ლიტერატურის, არამედ ახალი ტექნოლოგიებისა და ინოვაციების შესწავლა შეიძლება, ადგილი სადაც ტარდება პრეზენტაციები, კონსულტაციები, შეიძლება ჩატარდეს მასტერ-კლასები, ტრენინგები.

წლის განმავლობაში ჩვენთან ჩატარდა ინტელექტისა და განათლების საერთაშორისო სკოლა აიესაი-ს მიერ ტრენინგი ბუღინგის პრევენციის საკითხებზე; საქართველოს უნივერსიტეტის იმიტირებული გამოცდები; სახალხო დამცველის შეხვედრა ახალგაზრდობასთან; ტრენინგი პოლიციელებისათვის ოჯახური ძალადობის საკითხებზე, პედაგოგებისათვის -არგუმენტირებული ესსეს წერა; ტრენინგები ი/მეწარმეებისათვის. ბიბლიოთეკაში ხშირად იკრიბებიან მეფუტკრეები, მეთხილეთა ასოციაციის წევრები, რომლებსაც უტარდებათ კონსულტაციები თხილის კულტურასთან დაკავშირებით, ერთმანეთს უზიარებენ გამოცდილებებს. მიხარია, რომ ბიბლიოთეკამ უმასპინძლა ისეთ მნიშვნელოვან მოვლენას, როგორცაა გურიის მწერალთა კავშირის ჩამოყალიბება. ბატონმა ბადათერ არაბულმა მწერალთა კავშირის წევრობის მანდატები გადასცა ოზურგეთელ, ჩოხატაურელ და ლანჩხუთელ კალმოსნებს.

ბოლოს მინდა თქვენი ყურადღება მივაპყრო ბიბლიოთეკების პრობლემებზე. ეს ეხება მატერიალურ-ტექნიკურ ბაზას, ინვენტარს, ახალი წიგნებით მომარაგებას. იმისათვის, რომ მკითხველი მოვიდეს ბიბლიოთეკაში, მას იქ უნდა დახვდეს მყუდრო და კომფორტული გარემო და რა თქმა უნდა, ახალი წიგნები. ცენტრალურ ბიბლიოთეკას სასწრაფოდ ესაჭიროება კაპიტალური რემონტი, განსაკუთრებულად საშიშ მდგომარეობაშია ელექტროგაყვანილობა და წინა ფასადი, საიდანაც მუდმივად ცვივა ფილები. მისასალმებელია, რომ გარემონტდა შემოქმედის სასოფლო ბიბლიოთეკა, თითქმის ყველა სასოფლო ფილიალის ბაზა სარემონტოა.

გმადლობთ ყურადღებისათვის